

元代史書 四卷

元代
史料刊叢
初編

黃山書社

守中字子平始入太學世祖召問時政條對詳敏如素習吏事者世祖稱之年二十二以世胄供奉內廷歷尙服院出爲懷慶路判官坐事左遷河南行省理問丁父憂起爲典瑞院丞僉典瑞院事不赴服闋除集賢侍讀學士出爲浙江道廉訪使以弟守庸爲御史改河南行省參知政事河北饑部使者下令逐流民南渡守中止而賑之全活無算遷湖廣行省參知政事江西歲給蒙山銀冶糧四萬餘石輸銀三萬五千兩興國路龍閣諸山亦產銀有謂包辦興國銀冶者守中曰此姦利之民斥弗聽旋改漢中道廉訪使時泰定帝崩燕鐵木兒迎懷王於江陵使河南行省平章伯顏簡兵扈從守中赴漢中任過河南伯顏留之與聞密議伯顏遣孛羅守潼關守中諫不聽已而潼關果失守懷王至召賜白金百兩除河南道廉訪使使將兵守武關事平遷湖北道廉訪使晉階正奉大夫歲大饑豪民控米商閉糴城中斗

米至萬錢守中適至杖其黨與七十餘人米大賤撥貢
士莊錢入學養士俾不至以饑廢學又刻朱子戊申封
事於南陽書院以教學者士論翕然頌之後以病乞歸
至順四年卒於家年六十一贈樞密副使追封趙郡公
諡清獻三子鉅鉉鑄錫僉羣玉內司事鑄監察御史
守簡字子敬士珍第三子也甫冠入直宿衛仁宗察其
忠謹授集賢侍讀學士守簡辭帝曰朕知卿家法崇禮
讓宜成卿之美乃以守簡兄守中代之換守簡僉典瑞
院事帝賜守簡大學衍義適近侍進酒守簡引衍義之
說以諫帝大悅英宗卽位命守簡代祀秦蜀山川陝西
飢守簡移行省開倉廩賑之復命謝專擅之罪帝曰卿
朕之汲黯也除淮安路總管歲旱條荒政便宜奏之未
及報先以祿廩倡官民輸錢粟流民爲粥食之士著則
給以錢使不失其業邗溝涸發官帑浚之使饑民得食
其力公私皆以爲便未幾遷汴梁路總管郡人挽留不

得行由他道而去有吏於汴而不返葬者弟利其資逼寡嫂啓冢歸其柩嫂匿其骨之一體弟訴之下嫂於獄豪家又覬以賤價售其田宅共賄獄卒殺嫂以瘞死聞守簡廉得其實豪家獄卒與弟皆論死陳州有惡少爲何人所殺且誘其妻以逃事覺有司逮其族人論死守簡詰吏曰惡少死其妻安在吏不能對乃捕其妻至一訊而服汴人以爲神明擢海北海南廉訪使廣西徭人竊發官軍不能制守簡劾其總兵官罷之諸將皆肅然聽命徭患遂平累擢江東廉訪使以疾告歸召爲大都路總管兼大興尹辭不就遣中使賜上尊強起之旋除樞密院判官至正元年出爲山東廉訪使未行拜中奉大夫陝西行省參知政事復以疾辭改浙西廉訪使擢湖廣行省左丞又改江南行臺御史中丞先是建集慶寺取官沒田宅給之內有故平章政事張瑄別業未幾勅復歸張氏有司猶觀望守簡至立命歸之召還拜御

史中丞至正四年九月遷中書左丞尋命知經筵事新進士授官吏部奏恐礙入粟補官者守簡曰朝廷下詔求賢將儲爲公卿也苟急於此而緩於彼人將謂讀書不如獻粟恐貽笑於天下後世乃授進士官如故事有司患盜欲重法以懲之守簡曰民貧故爲盜不思保民而淫刑以逞可乎或謂去歲汴中亂連坐者猶未竟其獄此盜所以起也守簡曰罪人已得州縣奉行文書容有不能辨其真僞者未可以首從論且事在赦前使國家失信何以安反側於是繫獄者百餘人皆釋不問廷議以盜發禁漢人挾弓矢帝曰董左丞祖父佐祖宗征伐四方豈得以漢人待之賜良弓二命其族人皆得挾弓矢四月惠宗北巡命守簡留守京師賜御衣一襲未幾以左丞總裁遼金宋三史復拜御史中丞進榮祿大夫至正六年卒年五十五贈推誠佐治濟美功臣榮祿大夫河南行省平章政事上柱國追封冀國公諡忠肅

子鑑

士良文忠第二子由曲陽尹累遷開州尹文忠卒世祖召見諸子士良偕其弟士恭入見帝熟視之指士良語左右曰此兒甚肖其父遂命入直宿衛以母疾謝歸再起爲曲陽尹縣陶繚盜歲貢之是年變色爲赤士良曰禮奇器不入公宮悉毀之人服其有識士良嘗以公事至曲阜孔氏有相爭之獄累年不決聞士良至咸愧而相告曰吾輩所爲何以見董公遂罷訟泰定四年卒士恭字肅卿文忠第五子幼端重未嘗見其嬉笑文忠卒世祖召見諸子士恭年甫十三命往返步於延中正色歛容周旋中度帝甚奇之間學射否對以漢人挾兵有禁帝卽以弓矢賜之仍命董氏一族弛挾兵之禁後入眞宿衛從成宗至三不刺命代祀岳瀆復命奏對稱旨世祖常呼文忠爲八哥帝因呼士恭爲察罕八哥其見親禮如此大德九年授典瑞少監十一年有位士恭

下者中書奏遷太監帝怒曰董少監不遷何耶特命擢
典瑞太監階正議大夫成宗崩安西王阿難答覬覦神
器亟索符璽士恭持不與仁宗入平內難士恭奉御寶
以進武宗卽位賜黃金帶以旌之典瑞升爲院拜中奉
大夫同知典瑞院事四年出爲江南行臺侍御史蒞事
不務苛細人服其知大體皇慶二年典瑞復爲監授典
瑞卿使屬吏佩金字圓牌馳驛召之有宗室位士恭下
固讓之帝不允士恭始拜命帝問民所疾苦以省刑薄
歛對問臣子之道以忠孝對帝大悅延祐二年拜陝西
行臺御史中丞丞相阿斯罕迎詔便服不拜又肩輿登
堂北面坐士恭厲色責之叱左右去其肩輿翌日諸御
史踵門謝曰微公臺綱幾墜未幾謝病歸累除河南江
北淮東西道廉訪使俱不赴至順元年卒年五十三子
守讓東昌路總管守訓中書工部司程守誠衡水尹有
惠政縣人立碑頌之

史臣曰彙城董氏與永清史氏定興張氏皆爲功臣之
胄董氏被服儒術家法尤嚴父子兄弟世濟其美出任
干城入爲腹心詩云惟其有之是以似之其董氏之謂
與

列傳第三十九

新元史卷之一百四十二

賜進士出身日講起居注官翰林院侍讀國史館纂修膠州柯劭忞撰

汪世顯

忠臣

德臣

良臣

惟正

汪世顯字仲明鞏昌鹽川人本姓王父彥忠隸於汪古
部故改姓汪世顯仕金屢立戰功爲征行從宜分治陝
西西路時軍儲匱世顯出家貲爲豪右率鄰州效之兵
食以足哀宗以忽斜虎爲鞏昌總帥世顯同知府事二
人同心固守及忽斜虎勤王敗潰乃以世顯代爲總帥
哀宗遷蔡州欲奔鞏昌以粘葛完展爲鞏昌行省蔡州
破完展欲安衆以待嗣立者乃遣人稱使者自蔡州宣

論世顯知哀宗凶問且嫉完展制之遣使約會州守將郭斌併力圖鞏昌使者至爲斌所拒且曰爾帥欲背國家任自爲之何爲及我世顯遂襲殺完展據鞏昌及皇子闕端至乃率衆降皇子曰吾征四方所至皆下汝獨固守何也對曰臣不敢背主失節又問曰金亡已久汝不降果誰爲耶對曰大軍迭至莫知適從惟殿下神武不殺竊意必能保全闔城軍民是以降也皇子大悅承制授世顯舊官從伐宋斷嘉陵江擣大安宋將曹友聞潛兵與諸蠻相爲犄角世顯敗之入武信遂進逼葭萌宋將依山爲柵世顯以數騎襲奪之乘勝定資州略嘉定峨眉進次開州宋軍屯萬州南岸世顯卽水北造船以疑之夜從上游乘革舟以濟敗之追奔至夔峽與宋援軍遇斬首三千餘級明年師還攻重慶會大暑乃罷歸入覲太宗錫金符易其名曰中山且厯數其功十三年蜀帥陳隆之貽書請戰聲言有衆百萬闕端集諸將

議之咸謂隆之可擒世顯曰顧臨敵何如耳不必誇辭
進薄成都隆之戰屢卻堅壁不出其部曲田顯約夜降
隆之覺之世顯曰事急矣亟梯城入救顯得與從者七
十餘人出獲隆之斬之世顯復簡精銳五百人擣漢州
州兵三千出戰盡殲之三日大軍薄其城克之六皇后
稱制二年關端承制拜世顯便宜總帥秦鞏等二十餘
州事皆聽裁決賜虎符錦衣玉帶世顯先己遘疾至是
加劇卒年四十九中統三年追封隴西公諡義武延祐
七年加封隴右王七子忠臣德臣直臣鞏昌中路都總
領戰歿良臣翰臣兵馬都元帥佐臣鞏昌左翼都總領
戰歿清臣四州行樞密院副使

忠臣字漢輔以管軍總領從攻成都入其外城世顯陷
伏中忠臣手殺十餘人翼世顯而出後從克疊州賜金
符世顯卒忠臣讓世爵於弟德臣皇子闊端嘉之以忠
臣爲鞏昌元帥知府事憲宗二年權都總帥事世祖征

雲南禡牙臨洮忠臣上調使督嘉陵漕運九年帝自將
攻蜀德臣集諸將問曰吾境內凋瘵一旦乘輿至左右
貴近之需索何以應之忠臣曰吾輩拔身健兒惟應效
死前驅何至爲媚人計汝但恤吾妻子足矣德臣泫然
灌酒於地誓與諸將同生死忠臣從憲宗攻苦竹隘先
登賜銀四百五十兩復從攻長甯山又以先登賜銀幣
德臣卒於合州忠臣集將佐議曰吾弟歿王事子惟正
雖未冠宜世其爵諸將乃奉惟正爲總帥中統元年授
忠臣副總帥戍青居山三年璽書褒美賜虎符復以弟
良臣代之卒於鞏昌年四十八諡忠讓子惟益襲副總
帥孫安昌懷遠大將軍便宜都總帥

德臣賜名田哥字舜輔襲爵鞏昌等二十四路便宜都
總帥從征蜀將前軍出忠涪所向克獲進攻運山所乘
馬中飛石死步戰拔其外城宋將余玠攻漢中德臣馳
援之玠聞遁去憲宗素聞其名入覲賜印符命城沔州

數日而畢進攻嘉定敵潛軍夜出德臣迎戰殺百人還至雲頂山宋軍乘夜斫營覺之擒斬無算進次隆慶宋軍仍夜出與力戰大敗之及馬漕滿遇伏兵獲其統制羅廷鶚又詔德臣城益昌諸戍皆聽節制世祖以皇弟有事西南德臣入見乞免益昌賦稅及徭役漕糧屯田爲長久計並從之命置行部於鞏昌立漕司於沔通販鬻給餽餉奏乞以兄忠臣攝府事使已得專事益昌益昌爲蜀喉襟宋人憚其威名不敢犯已而嘉陵漕舟水溢議者欲棄去德臣曰國家以蜀事托我有死而已奈何棄之盡殺所乘馬饗士襲嘉州得糧三千餘石雲頂守將呂遠以兵五千邀戰擒之復得糧五千石獲宋提轄崔忠鄭再立縱令持檄諭苦竹守將南清以城降所俘城中民悉歸之戍卒數百人有去志德臣揣知之給券縱去皆泣謝未幾山寨相繼輸欵宋將余晦遣都統甘閏以兵數萬城紫金山德臣選精卒銜枚夜進大破

之閏僅以身免南清入覲其下殺清妻子叛宋將焦遠饋以糧德臣擊敗遠盡獲所饋糧又敗宋援兵獲糧百餘艘魚關至沔水迂回爲渡百有八至是爲橋梁以通行旅憲宗親征次漢中德臣朝行在所初成都猝爲宋人所圍德臣遣將赴之約曰先破敵者奏領此城圍遂解詔俟江南事定如約以城與之帝幸益昌駐北山謂德臣曰來者言汝立利州之功今見汝身甚小而膽甚大不知敵會薄汝城否德臣對曰賴陛下福未嘗一來帝曰彼憚卿威名耳賜金帶且俾立石紀功嘉陵白水交會勢洶急帝問船幾何可濟德臣曰大軍百萬非可久淹當別爲方略卽命繫舟爲浮橋一夕而成如履坦途帝顧謂諸王曰汪德臣言不虛發賜白金三十斤仍命刻石紀功苦竹旣逆命至是攻之巖壁峭絕或請建天橋帝以問德臣對曰臣知先登陷陣而已他非所知也旣而橋果無功乃率將士魚貫而進帝望見難曰人

言其膽勇豈虛譽耶宋守將趙仲武納款楊立猶率所部拒戰德臣奮擊盡殺之俄有疾帝勞之曰汝疾皆爲我家飲以葡萄酒解玉帶賜之曰飲我酒服我帶疾其瘳乎德臣泣謝宋龍州守將王德新遣使來納款乞宥州民抗命之罪奏如其請進攻長甯拔之斬守將王佐帝東下德臣爲先鋒抵大獲山奪水門宋將楊大淵降己而運山青居大梁皆降攻釣魚山守臣王堅負險五月不下德臣率死士夜登外城馬軍寨殺守寨者梯折後軍不繼乃還德臣單騎至城下大呼曰王堅我來活汝一城軍民宜早降語未既幾爲飛石所中遂感疾帝遣使問勞俾還羣昌奏曰陛下尊爲天子猶冒寒暑服勞於外臣待罪行伍死其分也卒年三十有六中統三年追封隴西公諡忠烈六子長惟正次惟賢大司徒中書右丞惟孝參知政事昭文館大學士惟明以質子爲元帥惟能征西都元帥惟純權便宜都總帥屯田上萬

戶府萬戶

良臣年十六七卽從兄德臣軍中每戰輒爲前鋒以功
擢裨將兼便宜都府參議憲宗三年以德臣薦爲鞏昌
帥領所部屯田白水憲宗親征軍至六盤良臣還鞏昌
供億所須民無擾累詔權便宜總帥府事良臣奏願與
兄德臣効力定四川帝曰行軍餽餉所係不輕汝任其
責可也以勞賜黃金弓矢世祖卽位阿藍答兒渾都海
逆命刦六盤府庫西垂騷動詔良臣討之兵至山丹賊
按兵不戰者凡二月俄大舉至耀碑谷兩軍相當良臣
慷慨誓諸將曰今日之事係國安危勝則富貴可保敗
則身家併盡苟能用命雖死行間不失忠孝之名衆踴
躍而前會大風揚沙晝晦良臣手刃數十人賊勢沮衆
軍乘勝擣之賊大潰獲阿藍答兒渾都海捷聞賜金虎
符權便宜都總帥中統二年合剌叛復討平之入覲賜
燕屢稱其功良臣拜謝曰臣奉諸王成算何功之有世

祖嘉其能讓復賜金鞍甲冑弓矢轉同簽鞏昌路便宜都總帥凡軍民官並聽良臣節制宋將咎萬壽帥戰船二百泝江而上欲掩青居良臣伏甲數十艘身先逆戰萬壽敗走伏發幾獲之三年授閬蓬廣安順慶等路征南都元帥良臣以釣魚山險絕不可攻奏請就近地築城曰武勝以扼其衝四年春良臣攻重慶命元帥康脫脫先驅與宋將朱禔孫戰兵交良臣引兵橫擊敵敗走趨城不得入盡殺之至元六年授東川副統軍八年兄子惟正請於朝謂良臣勞苦乞身代之九年復授良臣昭勇大將軍鞏昌等二十四處便宜都總帥兼本路諸軍奧魯總管明年入覲帝曰成都被兵久須卿安集之授鎮國上將軍樞密副使西川行樞密院事蜀人安之十一年進攻嘉定咎萬壽堅守不出築壘逼其城萬壽悉軍出戰大破之萬壽遂降良臣統兵順流而下紫雲瀘叙相繼款附還圍重慶十三年宋涪州安撫楊立帥